

# **Paulus haitua susurak fee nonoon Titus**

## *Soda-molek*

**1:4** Ana Titus fo malole!

Susurak ia numa au mai, Paulus, Manetualain hatahorin neondan no Yesus Karistus nedenun. Ana nadenu au fo atetea hatahorir fo Ndia here nalak kara nemeheheren. Ana oo nadenu au atudu eno-dala ndoos, fo ara bubuluk leo-la'o tungga Manetualain hihii-nanaun boe. No dalak naa, Manetualain hatahorin nara ramahena rae, neu ko ara rasoda sama-sama rakandoo roon. Manetualain ta bei adu dae-bafok ia, tehuu Ana helu-bartaa memak ena nae, neu ko Ndia hatahorin nara leo-la'o rakandoo roon. Memak Ana ta mana kokola bafa rouk. Ndaa no fain, Manetualain natudu no manggaledon ena nae, Ana nau tao nasoi-nasoda hatahorir ruma sira sala-singgon nara mai, fo ara bisa leo-la'o rakandoo roon. De Ana parenda au fo la'ok uu tuibengga Hara Lii Malole naa neu basa hatahorir nai bee a mesan.

Titus! O sama leo au ana heli-heling ena, nahuu o mua au sama-sama tamahere neu Karistus ena. Dadi au hule-haradoi neu Amak Manetualain, ma Yesus Karistus mana tao nasoi-nasoda ita, fo ratudu Sira dale susuen neu o, fo o leo-la'o no lino-lendek ma mole-damek.◊

---

◊ **1:1-4** 2 Korentus 8:23; Galatia 2:3; 2 Timotius 4:10

*Dudu-furak fee hatahori mana dadi malangga saranik*

<sup>5</sup> Fai maneuk kara au aketu fo la'o ela o numa pulu Kereta, mita fo o koladu mala dede'ak hida fo bei parluu nai naa. Naa fo o so'uk mala hatahori bee fo randaa rakalala'ok saranik kara marai kota esa-esak. Boso lilii-ndondou hohor-lalanek naa, fo au afada neu o la'e-neu hatahori fo mana nakalala'ok saranik kara ena. Nae:

<sup>6</sup> mete ma sangga so'uk hatahori dadi malangga saranik, ndia leleo-lala'on ta bole hambu salak hata-hata. Ana muste leo-la'o dalen mahaniik no kada sao inak esak ka. Hatahori naa, anan nara oo muste ramahere neu Yesus Karistus boe. Boso losak hatahorir rae, anan nara raa soa tao mue-anggik, ma soa ralaka.

<sup>7</sup> Huu malangga saranik kara rakalala'ok Manetualain ue-osan, de ara muste leo-la'o no ndoos ma raena nade malole. Boso so'u hatahori mana soa nakadedemak aon, hatahori nasa tuak, hatahori mana ninu mafuk, hatahori mana hii kada nahuur, ma hatahori mana dale hedi doik.

<sup>8</sup> Hatahori mana makalala'ok saranik kara, ara muste nau simbok hatahorir nai uman nara no lima nekembelan. Ara muste hii kada neulauk; muste matu-matuk, fo ta mbeu seserik, fo dale lolo-laok, ma bisa nakatataka nala aon.

<sup>9</sup> Ara muste to'u rahere Manetualain Dede'a-kokolan, fo fai bakahulun ita tanori sara. No dalak naa, ara bisa ratudu Manetualain eno-dala ndoon neu hatahori laen, ma bisa tao ratetu nenori ta ndoos sara.◊

*La'e-neu hatahori mana fee nenori ta ndoos sara*

---

◊ 1:9 1 Timotius 3:2-7

<sup>10</sup> Hambu hatahori no'uk ka hii rareresi la'e-neu nenori ndoos. Dede'a-kokolan nara huusu'u taak kara, ma ara hii kada pepeko-leleko. Lena-lenak bali hatahori Yahudir mana rae basa hatahorir bee fo nau hambu masoi-masodak kara, muste sunat.

<sup>11</sup> Ara pake sira nenori kasalan nara, fo le'a reni nufaneluk kara ketuk losa la'o ela Lamatuak nenori ndoon. Hatahori matak leo naak kara raa, sangga kada doik tungga dala pakana'ek a mesan! Ka'i-ore sara, mita fo ara boso fee nenori ta ndoos rakandoo.

<sup>12</sup> Faik esa, sira mana helo binin esa numa pulu Kereta mai, tui la-e-neu ndia hatahori heli-helin nae,

“Hatahori Keretar soa pepeko-lelekok.

Ara bare-na'ok ma mbera-baren nara seli!  
Tatao-nono'in nara, sama leo busa-bafir.”

<sup>13</sup> Memak hatahorir raa leo naak kara! Dadi o muste le'a-nore falik hatahori fo mana hambu kedi-irak kara raa, fo matetea falik sira nemeheheren neu Lamatuak.

<sup>14</sup> Kokoe sara fo boso ramanene seluk hatahori Yahudir tutui lasik fo ta teteben nara. Ara oo muste hahae tungga parenda numa hatahori mana timba henin nenori ndoos mai boe.

<sup>15</sup> Masaneda matalolole! Soa-neu hatahori dale lolo-laok, basa-basan lolo-laok. Tehuu soa-neu hatahori dale manggenggeok, ma ta namahere neu Lamatuak, ta hambu hata esa boe na lolo-laok. Huu sira dalen ma dudu'an nara manggenggeok memak ena.

<sup>16</sup> Ara manaku rae, sira ralela Manetualain. Tehuu sira leleo-lala'on nara, sama leo ara ta ralela sana. Ara kokolak laen, tao laen. Memak

oka-huun hatahori dae-bafo mburu manggrauk! Ara ta nau tungga Lamatuak hihii-nanaun. Boso mamahena mae hatahori matak leo naak kara, bisa tao hata fo neulauk bali!

## 2

*Nenori ndoos dadi oka-huuk numa leleo-lala'o  
ndoos mai*

<sup>1</sup> Tehuu Titus, o boso sama leo sira, ee! O muste le'a-nore sara fo leo-la'o tungga Manetualain nenori ndoon.

<sup>2</sup> Mafada ama lasik kara, fo leo-la'o tungga hohoro-lalanek, ranea nade malole, ma leo-la'o no matu-matuk. Ara muste to'u rakandoo ma rakanataka tungga Manetualain nenori ndoon. Ma ara muste sue hatahori laen.

<sup>3</sup> Leo naak oo bei lasin nara boe. Mafada sara fo ranea ratalolole sira nenggetuu-nemberiin, ma leo-la'o taa-taa tungga Manetualain hihii-nanaun. Boso tao maboboo hatahori naden. Boso ike aon nara ro kada laru-ara. Tehuu ara muste ranori hatahorir fo leo-la'o no malole.

<sup>4</sup> No dalak naa, ara ranori ma ratudu dala malole neu basa ina muri anak kara, fo sue-lai sao-anan nara.

<sup>5</sup> Ara muste ranori sara fo leo-la'o no matu-matuk, leo-la'o no lolo-laok, fo rafafa'u uma-loon nara no malole, fee hada-horomatak neu saon nara, ma fee sira saon nara rakanala'ok uma-loo. Mete ma ara leo-la'o talo naa, neu ko ta hambu hatahori esa boe na bisa kokolak rakanutudak Manetualain Dede'a-kokolan.

<sup>6</sup> Leo naak oo, fee nenori-nefadak neu tou ta'e anak kara, fo leo-la'o no matu-matuk boe.

<sup>7</sup> Titus! O muste leo-la'o matalolole, fo dadi neu netuduk soa-neu hatahori laen nara. O tao

hata a mesan, o muste taon no tetebes, sama leo hata fo o manorin neu hatahorir. Boso makamiminak mua o ue-osam mara.

<sup>8</sup> Mete ma o manori hatahorir, na, o muste pake oka-huuk matea, mita fo hatahorir ta hambu dalak hata-hata fo bisa raselu kisubalik o. No dalak naa, hatahorir mana laban ita, mesa kasa mae, nahuu ara ta raena oka-huuk fo nggafu fee ita.

<sup>9</sup> Manori hatahorir neondak kara, fo ramanene neu sira lamatuan nai dede'ak hata a mesan, ma tao ramahoko lamatuan nara dalen. Ara oo boso rasimbo bafak ro lamatuan nara boe.

<sup>10</sup> Ara ta bole ramana'o rala sira lamatuan buaba'un. Ara muste ratudu rae, sira lamatuan bisa namahere sira no katematuan. Sira raa muste dadi reu hatahorir neulauk ma dale mahanik. Mete ma hatahorir deak kara timba-tai neondak kara leleo-lala'on talo naa, ro basa hata fo ita tanorik, na, neu ko ara manaku rae, nenorik naa ta neni babanggak. Huu ita tanori la'e-neu Manetualain mana tao nasoi-nasoda ita ena.

<sup>11</sup> Manetualain natudu Ndia dale susuen neu basa hatahorir ena, ma soi dala masoi-masodak soa-neu hatahorir numa sala-singgon nara mai.

<sup>12</sup> Huu naa de, ita muste timba hen leleo-lala'o ta ndoos, ma basa ao-mbaak hihii manggarau nara. Ita leo nai dae-bafok hatematak ia, ma muste takatataak aok, leo-la'o no lololaok, ma ita dalen nara muste mahanik no Manetualain.

<sup>13</sup> Hatematak ia ita tamahena taa-taa neu Yesus Karistus mamain no ta neni babanggak sudi selik kana! Naa, dadi neu baba'e-babatik soa-neu ita basa ngga. Ndia naa, ita Lamatuan fo ta neni babanggak, fo mana tao nasoi-nasoda ita ena.

<sup>14</sup> Ana loo lima aon dadi neu tunu-hotuk fo nakambo'ik ita numa basa ita sala-singgon lala'en mai, fo tao ita dadi teu Ndia hatahorin mana leo-la'o no dale lolo-laok, ma mana soa nau tao hata fo neulauk. <sup>◊</sup>

<sup>15</sup> Dadi Titus, fee nenorik basa iar neu saranik kara. Tao mambena dalen nara, fo ara tungga basa nenorik kara raa lala'en. See ndia tao salak, na, matudu dala malole neu sara. Hatahorir boso mete rakadadaek o, nahuu o maena haak fo tao dede'ak kara raa.

### 3

#### *Hatahorir Karisten leleo-lala'o ndoon*

<sup>1</sup> Fee nesenenedak neu saranik kara, fo ramene neu man-parendar ma hatahorir mana to'u koasar. Ara oo muste tao tungga basa hohoro-lalanek kara boe. Ma muste rahani a taataa fo tao hata fo neulauk.

<sup>2</sup> Ara boso adu bafa-maan nara fo rakalulutu hatahorir nade malolen. Boso hii rasimbo bafak boe. Malole lenak, leo-la'o neulauk no dale susuek neu basa hatahorir.

<sup>3</sup> Fai bakahulun, neu lelek fo ita bei ta talela Lamatuak Yesus, ita oo bei ta bubuluk hata-hata, ma hambu kedi-irak no muda hiek boe. Ita ta hii nenene hatahorir laen. Ita leo-la'o tungga kada ita ao-mbaan hihin mata-matak. Ita dalen ta neulauk to hatahorir laen. Ita leleo-lala'on sofek no dale mana mbirik. Ita soa tambeda dalek, de hatahorir oo rambda dalek neu ita boe.

<sup>4</sup> Leo mae ita masodan nakalulutu talo naa oo, tehuu Manetualain natudu Ndia susue-lalain ma

---

<sup>◊</sup> **2:14** Sosoda Kokoa-kikiok kara 130:8; Kalua numa Masir mai 19:5; Tui Seluk la'e-neu Dala Masodak 4:20; 7:6; 14:2; 1 Petrus 2:9

dale susuen neu ita ena boe, no dalak Ana tao nasoi-nasoda ita.

<sup>5</sup> Ana tao nasoi-nasoda ita, ta huu ita tatao malolen, tehuu Ndia susue-lalain neu ita. Ana safe-sae nalalao ita sala-singgon nara, pake Dula-dale Malalaon fo nabeu ita masodan, sama leo bonggi seluk ita.

<sup>6</sup> No Yesus Karistus maten ena fo tao nasoi-nasoda ita numa ita sala-singgon nara mai, huu naa de Manetualain haitua Ndia Dula-dale Malalaon mai fee ita, ma ta nakatataak kana.

<sup>7</sup> Huu Yesus dale susuen, de Ana tao nalole ita nekeesan to Amak Manetualain, sama leo ita ia, Ndia anan. De ita bubuluk tae, neu ko ita tasoda no ta mana ketuk to Ndia. Masodak naa dadi neu ita pusakan!

<sup>8</sup> Hata fo au kokolak ia, memak tetebes leo naak.

Hata fo au fee nenorik ia, hambu sosoan soaneu basa hatahorir. Huu naa de o muste fufu'a hatahorir fo tungga nenorik kara raa no tebetebe. Basa hatahorir fo mana ramahere neu Manetualain, muste sangga dalak taa-taa fo tao hata fo neulauk.

<sup>9</sup> Boso muu sorodododo mua dede'a kokola bafa rouk kara, ndia leo: masimbo bafak no dede'a huu-su'u taak, mareresi sadiaa mua hatahorir, mandundu-tofak la'e-neu see tititignonosin mo'on lenak, ma mahuur la'e-neu Yahudir hada hohoro-lalanen nara. Tao hata? Basa naar, ta raena sosoak hata-hata. Ngganggari hen i kada ledo-fair no hie-hie a mesan!

<sup>10</sup> Muu fee nenori-nefadak neu hatahorir mana tao nabingga-ba'ek hatahorir saranik kara. Mete ma ana bei tao seluk talo naa, na, ka'i-oren no

hara berak. Mete ma ana bei tao nakandoo bali, na, boso mbalin bali.

<sup>11</sup> Hatahorि matak leo naak, dudu'an ta natetu ena. Ndia tatao-nono'in mesa kana ndia natudu basa hatahorir nae, ndia sala.

*Paulus nate'e susuran*

<sup>12</sup> Au aena nanaek ae adenu Artemas do Tikikus, fo neti natonggo no o nai pulu Kereta. Mete ma ana losa ena, na, o maote mai lai-laik fo matonggo mua au nai kota Nikopolis. Fai makasufuk ia, au hii alan seli uu leo nai naa.<sup>◊</sup>

<sup>13</sup> O malela hatahorि mana malela hukun, manade Senas naa, no nonoon Apolos, hetu? Ara sangga la'o reni dae dook reu. Dadi tulun doi-sou sara mita fo ara ta to'a-kuran hata-hata nai dalak.<sup>◊</sup>

<sup>14</sup> Hatahorि fo mana tungga Lamatuak Yesus, ara ta bole ranggatuuk kada ifa liman nara. Ara muste ranori tao hata fo neulauk kara, ma tulun hatahorि mana to'a taak tetebes. No dalak naa, sira leleo-lala'on naena sosoak.

<sup>15</sup> Titus, ai basa ngga manai ia, haitua hara masodak neu o. Hara masodak oo neu ita nonoon nara fo sama-sama ramahere neu Lamatuak Yesus boe.

Au hule-haradoi oke fo Manetualain natudu Ndia dale susuen neu ei basa ngga.

Ba'u kada naa,  
Paulus

---

<sup>◊</sup> **3:12** Nedenuk kara Tutuin 20:4; Epesus 6:21-22; Kolose 4:7-8;  
2 Timotius 4:12    <sup>◊</sup> **3:13** Nedenuk kara Tutuin 18:24; 1 Korentus  
16:12

**Rote Tii Alkitab  
Genesis and the New Testament in the Rote Tii  
language of Indonesia  
Kejadian dan Perjanjian Baru dalam bahasa Rote Tii**

copyright © 2004-2011 Unit Bahasa dan Budaya

Language: Rote Tii (Tii)

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-28

---

PDF generated using Haiola and XeLaTeX on 18 Apr 2025 from source files dated 31 Aug 2023

376f544e-67b9-55a2-9875-b1335ebd71ac